



**HERNANIKO UDALERRIKO BIDE PUBLIKO
JAKINETAN IBILGAILUEN APARKAMENDU
MUGATUA ARAUTZEKO ORDENANTZA**

- ✍ Hasierako onespena: 2006ko martxoaren 30eko Udalbatzak emana
- ✍ Testu osoa 2006ko ekainaren 16ko 114. zenbakidun GAO-n argitaratua
- ✍ Indarrean sartze data: 2006ko uztailak 4.



HERNANIKO UDALERRIKO BIDE PUBLIKO JAKINETAN IBILGAILUEN APARKAMENDU MUGATUA ARAUTZEKO ORDENANTZA

1. artikulua. Xedea

Ordenantza honen xedea trafikoa antolatzen eta hobetzen laguntzea da.

Horretarako 3.500 kg arteko edozein zerbitzu partikular edo publikotako ibilgailuak bide publikoan eta bertan aurreikusitako aparkalekuetan aparkatzeko leku eta denborako mugak ezarriko dira.

Helburua herriko hainbat zonatan aparkatzeko eskaintza eta eskariaren artean oreka handiagoa lortzea da. Helburu hori lortzeko Udalak, bere kabuz edo zerbitzu hori emateko kontrata ditzakeen enpresen laguntzarekin, egin ditzakeen mugapen, kontrol eta inbertsio jarduketak egingo ditu.

2. artikulua. Seinaleak

Araubide berezia duten kaleen zerrenda I. Eranskinean jasota dago. Zona horiek behar bezala seinaleztatuko dira, eta seinale bertikalak (ahal den lekuetan) eta horizontalak jarriko dira.

Era berean, Alkatetza-Lehendakaritzak, gutxienez 15 egun lehenago, araudia aplikatuko den zona bakoitzean indarrean sartuko den egunaren berri emango du eta mugak ere adieraziko ditu. Horretarako iragarkiak argitaratuko dira Gipuzkoako Aldizkari Ofizialean, udaletxeko iragarki-taulan eta herrian gehien zabaltzen diren bi egunkarietan.

3. artikulua. Ordainketa

Ibilgailua araupeko aparkaleku moduan behar bezala seinaleztatutako leku edo bide publikoan aparkatzeagatik ez da ordaindu beharrik izango.

4. artikulua. Funtzionatzeko denboraldia

Aparkaldi mugatuak ordutegi hau izango du:

- Astelehenetik larunbatera, goizeko 9:00etatik 13:00era eta astelehenetik ostiralera 16:00etatik 20:00etara.

Alkatetza-Lehendakaritzak ahalmena izango du gehienezko ordutegi hori aldatzeko, zabaltzeko edo murrizteko bai eta ordenantza honetako egun, ordu eta aplikazio zonak aldatzeko ere. Gero aldaketa horien berri emango zaio Udalbatzari.

5. artikulua. Salbuespenak

Adierazitako bide publikoan edo zonetan aparkatzeko ordenantza honetatik salbuetsita daude ondorengo ibilgailuak:

a) Motozikletak, ziklomotoiak eta bizikletak, baldin eta aparkaldi mugatuko plazak okupatzen ez badituzte eta horrelakoak aparkatzeko egokitutako lekuetan baldin badaude.

b) Beren kategoriarako edo jarduerarako gordetako zonetan aparkatzeko udal baimena duten ibilgailuak.



- c) Zamalanak egiteko jarritako leku eta orduetan horrelako lanak egiten ari diren merkataritzako ibilgailuak.
- d) Autotaxi ibilgailuak, gidaria bertan eta zerbitzuan dagoenean.
- e) Hiletetako ibilgailuak, zerbitzuan daudenean.
- f) Larrialdietarako ibilgailuak: anbulantziak, suhiltzaileak, Gurutze Gorria, DYA eta polizia; horiek guztiak zerbitzuan daudenean.
- g) Barruan gidaria edo bidaiariren bat duen ibilgailu automobila, aparkaldia bost minutu baino gutxiagokoa denean.
- h) Minusbaliatuen jabetzako ibilgailuak edo bereziki egokitutakoak, zirkulazio baimena dutenak eta beren titularrek gidatzen dituztenean, baldin horrelakoak aparkatzeko lekuetan aparkatuta badaude.
- i) Horretarako bereizgarria indarrean duten ibilgailuak.

6. artikulua. Bertako bizilagunentzako bereizgarria

Oraingoz egoiliar-txartelik ez da emango. Hala ere, Udalak minusbalia edo bestelako arazo bereziak direla-eta bertakoentzako aparteko bereizgarriak eman ditzake.

7. artikulua. Aparteko bereizgarria jarduera ekonomikoagatik

Jarduera ekonomikoagatik aparteko bereizgarria eman ahal izango zaio ondoko baldintzak betetzen dituen eta dagokion zonan dagoen entitate juridikoari:

- a) Ibilgailuaren titularra pertsona juridikoa izatea eta jardueraren helbidea araututako zonan egotea.
Ibilgailua Hernaniko Ibilgailuen Zirkulazioaren gaineko Zergaren erroldan alta emanda egotea eta aurreko ataletan adierazitako titulartasuna eta helbidea bat etortzea. Gainera zerga hori ordainduta eduki beharko da.
- b) Honetarako ibilgailuaren jabetzat hartuko da Probintziako Trafikoko Buruzagitzak emandako zirkulazioko baimenean jasotzen dena.
- c) Bere jardueraren izaera berezia dela-eta ibilgailua etengabe erabili behar izatea. Ibilgailuaren beharra justifikatu egin beharko da. Udalaren esku egongo da aparteko bereizgarria emateko erabakia.
- d) Udalak jarritako trafikoko isunik izanez gero, hori ordainduta izatea. Arau hau entitate juridiko bereko ibilgailuei aplikatuko zaie.
- e) Dagokion Ordenantza Fiskalean bertakoentzako bereizgarria lortzeko jarritako tarifa ordaintzea.

Hernaniko Udalak emango ditu jarduerengatik bereizgarriak eta horien balioa zerbitzua indarrean izango den urtealdikoa izango da.

8. artikulua

Ordenantza honetan definitutako bereizgarrien onuradunek beren zonako toki libreetan denbora mugarik gabe aparkatu ahal izango dute.

Bereizgarria ibilgailuaren haizetarakoaren barrualdean jarri beharko da, kanpotik ongi ikusteko moduan. Bereizgarria baliagarria izango da zerbitzu publikoa indarrean izango den urtealdirako. Bereizgarri hori eskatzailearentzat eta eskatutako ibilgailurako bakar-bakarrik izango da.



Bereizgarria jaso duten eskatzaileak izango dira horien erantzule eta etxebizitza edo ibilgailua, edo bereizgarria eduki ahal izateko edozein baldintza aldatzen dutenean Udalari jakinarazi beharko diote gehienez ere astebeteko epean. Honela, beste bereizgarri bat emango zaie, horretarako eskubiderik izanez gero edo, bestela, lehendik zutena baliogabetuko zaie. Bi kasuetan bereizgarria itzuli beharko dute.

Bereizgarria lapurtu edo galtzen bada Udalari lehenbailehen jakinaraziko zaio.

9. artikulua. Betebeharrak

Bide publiko eta aparkalekuetan aparkatzeko, ordenantza honetako bigarren artikuluan adierazitako arau orokor eta zehatz guztiak beteko dira, ibilgailuak aparkatzeko seinale guztiak errespetatutako dira eta, gainera, haizetakoaren barnealdean kanpotik erraz ikus daitekeen ondorengo edozein agiri jarriko da:

- a) Egoiliar-bereizgarria. Arau orokor edo bereziren batek edo murriztapen-seinale batek debekatu gabeko lekuetan, denbora mugarik gabe aparkatzeko baimena izango dute.
- b) Ekonomia-jarduerentzako txartela. Arau orokor edo bereziren batek edo murriztapen-seinale batek debekatu gabeko lekuetan, denbora mugarik gabe aparkatzeko baimena izango dute.

10. artikulua. Zigor araubidea

1. Ordenantza honen edozein artikulua haustea, hala nola Alkatetza-Lehendakaritzak ordenantza honi buruz erabakitako ebazpenak haustea, trafiko eta zirkulazio antolamenduko arau-haustetzat hartuko da eta, ezarritako legezko prozeduraren bidez, zigorra jarriko da.

2. Behar bezala eskatuz gero, ibilgailuaren titularrak arau-haustea egin duen gidari erantzulea identifikatu behar du eta, dagokion prozedurazko izapidean justifikaziorik gabe obligazio hau bete ezean, berari jarriko zaio 10.3.j) artikuluan jasotako arau-haustearen zigorra.

3. Arau-hausteak:

- a) Aparkatzeko jarritako gehienezko denbora pasatzea.
- b) Ordenantza honetan adierazitako txartelik gabe aparkatzea edo horiek ez ikusteko moduan jartzea. Udalak txartela erakutsi beharrik ez dagoela erabakitzen badu, ez erakustea ez da arau-haustea izango.
- c) Aparkatzeko gehienezko denbora bukatu eta bi orduko epea pasa gabe zona berean aparkatzea.
- d) Bereizgarri manipulatu, faltsutu, baliogabetu edo desegokia erabiltzea.
- e) Bereizgarrien titularrek helbide aldaketa edo ibilgailuaren eskualdatzea jakinarazteko obligazioa ez betetzea.
- f) Ordenantza honetan jasotako bereizgarriak behar den moduan ez erabiltzea.
- g) Bereizgarria emateko beharrezko den betebeharren bat ez betetzea eta Udalari horretarako jarritako epean ez jakinaraztea.



- h) Bereizgarria jaso zuen ibilgailuaren jabetza eskualdatu ondoren ere, horren bereizgarria erabiltzea.
- i) Ordenantza honetan adierazitako beste edozein baldintza ez betetzea.
- j) Arau-haustea egin duen gidari erantzulea ez identifikatzea, aurrez eskatuta ere.

11. artikulua

Arau-haustek honakoekin bat etorritik zigortuko dira: Trafiko, Ibilgailu Motordunen Zirkulazio eta Bide Segurtasunari buruzko Legearen testu bateratua onartzen duen martxoaren 2ko 339/1990 Legegintzako Errege-dekretuaren testu artikulatua, V. tituluaren testu artikulatua aldatzen duen martxoaren 24ko 5/1997 Legeak aldatutakoa; abenduaren 19ko 19/2001 Legea eta legezko gainerako xedapen osagarrietan eta udal ordenantzetan erabakitakoak.

10.3 artikuluko a), b), c), e), f), g), h) eta i) puntuetan tipifikatutako arau-haustek 30 €-rekin zigortuko dira (kopuru hau urtero berrikusiko da).

10.3 artikuluko d) kasua 90 €-rekin zigortuko da (kopuru hau urtero berrikusiko da) eta horretaz gain bereizgarria baliogabetu eta 2 urte pasa arte ez zaio berririk egingo.

10.3 artikuluko a), b), c), d) f) eta h) ataletan tipifikatutako arau-haustek trafiko eta aparkamenduen zerbitzu publikoa antolatu eta hobetzeko oztopo larriak dira, beraz, oker okupatutako espazioa berreskuratzeko, udal agintaritzak ibilgailu hori jasoko du eta

horretarako prestatutako gordailura eramango du, ezar daitekeen zigor ekonomikoa kontuan hartu gabe.

10.3 artikuluko kasuetan autoa jaso egingo da, udal agintaritzak denbora mugarekin aparkatzeko egokitutako lekuetan horretarako baimena ematen duen bereizgarririk gabe aparkatzen bada edo, udal ordenantzan ezarritakoarekin bat etorritik, baimendutako denbora bikoizten baldin bada.

Ibilgailua bide publikotik jasotzeko zerbitzuak, Ibilgailuak Bide Publikotik Jaso eta Eramateko Zerbitzua Emateagatik Ordaindu Beharreko Tasa Arautzeko Udal Ordenantzetan xedatutako tasak sorraraziko dituzte. Ibilgailua itzuli aurretik tasa hauek guztiak ordaindu beharko dira.

XEDAPEN GEHIGARRIA

Ordenantza honetan xedatu gabeko kasuetan honakoak beteko dira:

- Hernaniko Hiri-bideetako Oinezkoen eta Ibilgailuen Zirkulazioa eta Trafiko Legehausteengatik Isunak arautzen dituen Udal Ordenantza.
- Aurreko Ordenantza garatzeko egiten den araudia eta aplikatzeko modukoa izan daitekeen gainerako legedia.

AZKEN XEDAPENA

Ordenantza hau behin betiko onarturik, Gipuzkoako Aldizkari Ofizialean osorik argitaratu eta handik hamabost egunera jarriko da indarrean.



I. ERANSKINA

TAO-K ARAUTUTAKO ZONAK

1 ZONA:

Urbietakalea, Biteri Kultur Etxearen parean.

Elkano kalea, Biteri Kultur Etxearen parean.